



**Bible Châng Thlan:** *Juda 9.*

**Thlûr Bing Tûrte:** *Nambar 20:1–13; Deuteronomi 34; 1 Korin 15:13–22.*

#### THEN 1-NA: ZIRLÂI TLÂNGPUI THLÎRNA

Tûn kuartara zirlâi hnuhung ber hi Deuteronomi bu-a bung tâwp ber, a bu tlângkawmna chungchâng a ni dâwn a. He a thu tlâwngkâwmna tîr lama ɽawngkam a hmante hi a bu thuhmahruai tîr lama a ɽawngkam hman ang tho kha a ni tih i lo hria em? Hêng thute hi Israel fatten Ram Tiam an luah hmâ deuh chiah, “Jordan chhak lam Moab ram phâizâwla” an awm lâia Mosian a puante kha a ni (*Deut. 34:1; Deut. 1:5; Nam. 36:13*).

Bung 34-a a sawi ɽum hi chuan tlâng chhîpah chuangin ram tiam chu a pumin a thlîr thei a. Dik taka sawi chuan, Mosia thih thu hi Deuteronomi 32:48–52-ah pawh la sawi chhunzawm zêl niin, hemi hmunah hian Pathianin kal tûrin a hrilh a (*Deut. 32:48*), Ram Tiama a luh ve theih loh chhan tûr a hrilh ta a ni. Tûn kâr zirlâiah hian Mosia thawhleth chungchâng kan thlûr bing dâwn a, hemi chungchâng hi a bu chhûng thu-ah hi chuan a thâwi thama sawi a ni ve zauh tih chauh lo chu sawi thui a ni lêm lo. Mosia thawhlethna pawimawh dân kha mihringte thawhlethna kan hriat thiam theih nân kan luh chilh dâwn a. Kha thil thleng khân Pathian chatuan lalram, Ram Tiam thara luh ve beiseina min pe ang.

**Zirlâi Thupuite:**

Hêng a hnuaiia thupui târ lan, tân lâi huna Pathian mite tâna tân kuartara kan zir tâkte tipawimawh zualtute hi kan en ho ang:

- Rorêlna dik leh khawngaihna
- Thihna leh thawhlehna
- Indona ropui

**THEN 2-NA: ZIR ZÂUNA**

Deuteronomi bu ang bawkin Genesis bu pawh hi a phûmna hmun hriat lova mi tu emaw a thih thu-a khâr a ni a, chu mi chuan Mosia ang bawh hian Ram Tiam a lût bîk lo (*Gen. 50:26*). Genesis bu hi, Mosia lehkhabu dangte ang bawkin thil siam thu leh Eden Huan chanchin sawina nêna bulţan niin, lei thar leh vân thar entîrtu Ram Tiam thlîrna nêna khâr a ni a. Hêng thil thleng pahnihte pawimawhna hi Pathian Lehkhabu-ah hian sawi nawn fo a ni. Hetiang hi Bible-a lehkhabu dangte-ah pawh kan hmu nual a: entîr nân, Isaia lehkhabu pawh hi thil siam thu-a inţan niin (*Isaia 1:2*) “lei thar leh vân tharte” (*66:22*) siam a nih thu leh kumkhaw tlaitluana Pathian chibai bûk beiseina thua (*Gen. 66:23*) khâr a ni. Thuhriltute bu hi khawvêl siam a nih thua ţan niin (*Thuhriltu 1–11*) khawvêl tihboral vek thu (*12:1–7*) leh rorêlna nî lo thleng tûr chungchâng sawina (*12:14*) nêna khâr a ni ve thung. Daniela lehkhabu hi khawvêl siam dân chanchin nêna bulţan niin, Daniela khân a ei in tûr thlante kha khawvêl leh, a chhûnga thil awmte siam a nih dân chanchin ziahna ţan chhanin a sawi fiah a nih kha (*Dan. 1:12; Gen. 1:29*).

Hetianga deuh hi Thuthlung Thar lamah kan hmu ve tho mai. Thil siam a nih lâia thil thleng sawi langa a chanchin ţa bu ziah bulţantu Johana chuan Isua Krista lo kal lehna beiseina leh Pathianin lalram a din thar leh dâwn a ni tih thu nên tâwpna huna thil thleng tûrte a ziahna lehkhabu Thupuan hi a khâr a (*Thup. 21:22, 23*). Hetianga a an lehkhabu chhûng thupuite indawt dân an lo rem hian Bible-a lehkhabu awmte indawt dân pawh

hi a lo kâihruai thui hle em ni aw a tih theih. A chhan chu, Bible hi khawvêl leh a chhônga thil awmte siam thu-a ințan a ni a (*Genesis 1, 2*), Messia lo kal beiseina thu-a khâr a ni bawk (*Mal. 4:5; Thup. 22:20*).

Hêng ngaihtuahna pahnihte dah dun a nihna hian Bible-a rinna awmzia a hrih fiahna awm chhun kan hmuh pawh hi a kâihruai a ni tih lo hria la: “Rinna chu thil beiseite awm ngeia hriatna [*Pathian lalrama beiseina nghahna; Heb. 11:13–16 chhiar la*], thil hmuh lohte hriat fiahna a ni [*khawvêl leh a chhônga thil awmte hi Pathian siam a ni; Heb. 11:3 chhiar la*]” (*Heb. 11:1*). Hetiang hian tihlan tum nei rân chônga Bible chhông thute hi chheh a ni tih hriat hi thil pawimawh tak mai a ni a, a chhan pawh hei hian Deuteronomi bu tâwp lama Mosia thawhleth thu inziak hi a pawimawh a, Bible chhiartute tân thuchah pawimawh tak a pâi a ni tih a tihlan vâng a ni.

### **Mosia Chunga Rorêlna/Hremna**

Pathian chuan Meriba Kedes- hmuna Mosia thil lo tihsual tawh kha a la hre eng a (*Deut. 32:51*), khami țin khân vawi hnih ngawt lungpui a vua a nih kha. Ellen G. White-i chuan heti hian a lo sawi a: “Mosia khân Pathian a rin zawh lohzia a tilang.”—*Thlahtubulte leh Zâwlneite*, p. 417.

Pathian thil sawi dân ațâng hian Mosia thiltih kha rinna chungchâng a ni tih kan hre thei a: “Mìn ring lo” tiin a zilh a ni (*Num. 20:12*). He a thutlûkna a siam hi a râwng deuh kan ti a ni mai thei e; mahse, manna lo tlâk dân ațâng khân a chhan chu kan hre thiam thei ang. Khatih lâi khân Israel fate chuan an ei leh in tûr ngawt an ngaihtuah a, chhang Petu ber erawh an rilru-ah a lang phâk rêng rêng lo thung (zirilâi 12-a “Thu Avânga Nung” tih kha en leh la).

Mosia rilru puthmang hi Israel mipuite rilru puthmang nêk khân a inang thui hle niin a lang a. Pathian hnêna ținwngtâi a, thilmak ti tûra kar ta lovin ama’n lungpui a vaw ta zâwk a, Israel mipui tuihâlna kha Siamtu Pathianah ni lovin lungpui ațanga rawn

luang chhuak tuisik zâwk hmanga chhâwksak a tum ni ngei tûr a ni. Heti lâia Mosia thil tihsual chu Pathian hnênah dîlna a thlen lo va, a châwimâwi lo kha a ni a.

Aigupta rama mitdâwivaih thiamte ang maia chein, Pathian thiltihtheihna âi chuan mitdâwihvaih thiamna hmanrua chu a ring zâwk a ni. Chu mai pawh chu a la ni lo, tui pe theitute zîngah khân amah pawh a inchhiar tel ve bawka, “he lungpui ata hi tui kan lâk chhuahsak dâwn che u em ni? (*Nam. 20:10*) a ti a nih kha. Mosia thil tihsual hi hruaitu dangte pawhin an lo tih ve fo tawh a ni a—Pathian dinhmun luahlan tum hi thil awl tak a ni ve thîn rêng a ni.

**Sawi Ho Tûr leh Ngaihtuah Zui Tûrte:** Nambar 20:1–13 chhiar la. Mipuite phunnâwina tihreh nâna Mosia thil tihsual dang, Pathian thinurna tawng bawtu chu eng nge ni? Lungpui hnêna thil sawi leh lungpui vuak kha eng nge ni a danglamna awm?

### **Moia Thawhlehna**

Deuteronomi bu-ah hi chuan Mosia thawhleh thu a lang lo. Deuteronomi 32:48–50; 33:1; 34:5-te hian Mosia thih thu chu an sawi ngei a; mahse, a thawhleh thu lam rêng rêng chu an sawi lo tlat mai. Amaherawhchu, a tholeh ngei a ni tih a lanna a awm nual tho thung a. Chûng zînga chhinchhiah tlâk ber chu, “Nimahsela, a thlân chu tûn thlengin tu mahin an la hre lo” tih hi a ni ang (*Deut. 34:6*).

Hemi hmâ chiah chângah hian Mosia phûm a nih thu-ah LALPA a lo chê a sawi a ni a, chu chuan Mosia kha a bik tak leh dangdâi deuh hleka phûm a ni tih a tilang. Chu bâkah chuan, “LALPA thu angin” tih hi Hebrai Bible-ah chuan ‘*al pi YHWH*’ tih a ni a. He tawngkam hi a ngialngana lehlin dâwn chuan “LALPA kâah” tih tûr niin, thih dang pângngâi ni lova thî a ni tih a kâwk. He tawngkam atang hian, hmâsâng Juda mi thiamte chuan Mosia kha Pathianin a fawh hnu-a thi ta a ni tiin an hrilh fiah a, a kâah

khân nunna thawh a thaw lût nia ngâiin (*Gen. 2:7*) Mosia kha a thih hnu-ah mak tak maia siam thar leh a ni e an ti.

Mosia kha a thih khân hrisêl leh chak tha tak a la ni a (*Deut. 34:7*), khatia a han thi thut mai kha thil nihphung pângngâi chu a ni lo hrim hrim a ni tih a lang. Pathianin a thihtîr a, tichuan Pathian vêkin a kâitho leh a ni. Amah Mosia ngei pawhin a hla phuahah khân Pathianin mitthi a kaihthawh theih thu a lo chham tel a (*Deut. 32:39*). Kanan ram kha Pathianin Israel hnam thlahtu bulte hnêna pêk a lo tiam tawh thu a sawi hian (*Deut. 34:4*) kaithawh a nih chhan a tilang ruak bawk a, a chhan pawh Ram Tiam kha Eden Huan hriat rengna a nih vâng a ni (*Gen. 15:18; 2:13–15*). Mosia hi Ram Tiam lei Kanana a luh ve phalsak a ni lo va; amaherawhchu, Ram Tiam vân Kananah khian hian lûtin Pathian mite lo hmuaktu rochan chu (*Dan. 12:2, 3, 13*) a lo han chang tawh a ni.

Ellen White-i chuan, Mosian Nebo Tlâng ațanga Kanan ram a thlîr kha lei thar, “ram tha tak” (*Deut 3:25*) a thlîrna nênzawm niin a ngâi a:

“A hmâah chuan thil hmuhnawm tak mai dah a ni a—ânychhia rêng rêng awm tawh lohna khawvêl, Ram Tiam âi pawha duhawm zâwk chu hmuhtîr a ni. Chutah chuan sualna a awm lo va, thihna pawh a lût thei hek lo. Chutah chuan chhandamten an chatuan in tûr an nei a. Chu hmun chu hlimna sawi hleih theih loh nênzawm a thlîr a—a lo suangtuah leh beisei thîn âia ropui zâwk daih chhanchhuahna chu a chang ta a ni.

Leia an vavaihna zawng zawng chu chatuan atân a lo tâwp ta a, Pathian Israel-te pawhiin ram tha tak chu an luah ta. Chutah a inlârna hmuh chu a kiang a, a mit chuan hla taka inpharh duai mai Kanan ram zâwk chu a hmu leh ta a. Chutichuan, sipai huaisen chau tawngkhawng ang main thlânah chuan a châwl ta a ni.”—*Thlahtubulte leh Zâwlneite*, p. 477.

**Sawi Ho Tûr leh Ngaihtuah Zui Tûrte:** Eng vângin nge Mosia hian Kanan ram a hmuh leh Pathian ram a hmuh kha inzwawm nia

a ngaih? Eng vângin nge Pathian hian Abrahamana te, Daniela te kha kâitho si lovin Mosia chauh a kaihthawh bîk? Eng vângin nge Deuteronomi bu hi Mosia thawhleth thu ni lovin, a thih thu-a tihtâwp a nih?

### **Indona Ropui**

Thil pawimawh tak kan hriat tûr chu, Mosia thawhlethna kha Pathian leh Setana inkâra indona ropui tak a awm thu tilangtu nia Judan a sawi hi a ni. Mikaela, indo mi ropui, Isua Krista leh ramhuai te inbeih tawwna hian khawvêl hmâkhua a hril a. Lehlamah Setana awmin, chu mi chuan Mosia kha thlâna awmtîr reng chhan tûr tha tak a nei ve a, a chhan pawh Mosia kha thil tihsual nei ve tho a nih vâng a ni. A lehlamah Isua Krista a awm ve thungin, ani chuan a thisen thiltihtheihna azârah Mosia thlavâng kha hauhin a chhandam ta a ni.

**Sawi Ho Tûr leh Ngaihtuah Tûr:** Genesis 3:15 leh Juda 9-te hi khâikhin la. Hêng châng pahnihtea thu inang awmte chu ziak chhuak ang che. Eng vângin nge Setana hian Mosia ruang kha a chuh nat viau mai le?

### **THEN 3-NA: NUNA BEL TÛR**

#### **Mosia Thil Tihsual Kha**

Bible-ah emaw, lehkhabu dangah emaw pawh, Pathian dinhmun chuhpuitu ram hruaitute emaw, sakhaw hruaitute emaw i hriat hriat sawi ang che. Chutianga Pathian lalna leh thuneihna an chuhpui avâng a thil tha lo lo thlengte chu nge nge ni? A hnuaia târ lante hi sawi ho ula, a chin fel dân tûr pawh ngaihtuah ho nghâl bawh ang che u:

- Thuhritlu lâh tak pakhat chuan mi tam tak baptis thu sawiin, a uanpui viau mai leh nghâl a. Engtin nge chanchin tha hril kawnga kan hlawhtlinnate hi kan hrih fiah ang?

- In kohhrana member pakhat chuan Pathianin a natna a tihdamsak a. Chutih lâiin, in kohhrana member ni ve tho pakhat dang erawh chu natna vêk avâng chuan a thi thung si. Engtin nge pakhat tihdam a nih lâia pakhat dang erawh tihdam a ni ve si lo lâi hi i sawi fiah ang?
- Mosia thil tihsual khân nangma thil tihsual chungchângah eng nge a zirtîr che?

### **Mosia Thawhlehna Pawimawhna**

Mosia thawhlehna khân nangma nun atân leh i rinna kawngah eng nge pawimawhna a neih? Engtin nge kha thil thleng khân thawhlehna a thleng dâwn a ni tih i rinna a tichak sauh le? Eng tiangin nge Mosia kha a tho leh ngei a ni tih thu hian nangmah pawh kha a takin i tho ve leh ngei dâwn a ni tih a nemngheh?

Pastor i ni a, mitthi i vûi a ngâi a, chutah chuan Mosia thawhleh thu hi i sawi dâwn ta a ni. Aw le, mitthi chhûngte hmemna tûrin eng thute nge i sawi ang? Mosia kha a tholeh ngei a ni tih fînfiah nân eng hnialfungte nge i hman ang? Eng tiangin nge Mosia thawhleh thu hian an rilru natna a chhâwk ang a, chutih rual chuan, an rinna a tihchaksak bawk ang?

Eng tiangin nge Mosia thawhleh thu hian Isua thawhlehna awmzia kha Chiang lehzuala hre thiam tûrin a ãanpui che?